

Media Title : Sinar Harian
Headline : Pesara kena tipu lebih RM845,000 oleh 'pegawai' LHDN, polis
Date : 29 May 2023
Section : Mahkamah & Jenayah
Page : 15



Pesara kena tipu lebih RM845,000 oleh 'pegawai' LHDN, polis

IPOH - Seorang pesara kerugian RM845,450 apabila terpedaya dengan penipuan panggilan telefon yang menyamar sebagai pegawai Lembaga Hasil Dalam Negeri (LHDN) dan pegawai polis dalam kejadian pada 9 Mei lalu.

Ketua Polis Perak, Datuk Seri Mohd Yusri Hassan Basri berkata, ketika kejadian mangsa berada di rumah menerima panggilan telefon daripada seorang individu yang memperkenalkan diri sebagai 'pegawai LHDN' sebelum disambung kepada dua orang 'pegawai polis' dari Ibu Pejabat Polis Kontinjen Melaka.

Menurutnya, mangsa yang berusia 74 tahun itu dimaklumkan pada awalnya mempunyai tunggakan cukai syarikat kemudian dipercayai kononnya mempunyai rekod terlibat dengan kes penyeludupan dadah dan pengubahan wang haram.

"Dalam percakapan telefon, suspek ketiga yang bergelar 'Datuk' telah mengarahkan mangsa untuk mengikut arahnya dan melaporkan maklumat akaun bank serta pergerakan dari semasa ke semasa kepada suspek.



MOHD YUSRI

"Atas arahan suspek, pengadu telah membuat pemindahan wang sejumlah RM845,450 melalu mesin deposit tunai (CDM) secara berperingkat ke dalam 14 akaun bank atas pelbagai nama dari 10 Mei 2023 sehingga 19 Mei 2023, kononnya untuk tujuan semakan," katanya dalam satu kenyataan.

Beliau memberitahu, tidak cukup dengan itu, suspek juga memberi tempoh sebulan kepada mangsa untuk menjual rumahnya bagi tujuan semakan dan mengarahkan mangsa supaya tidak memaklumkan perkara ini kepada pihak ketiga.

Bagaimanapun, penipuan itu akhirnya terbongkar selepas mangsa meminta rakan-nya untuk mencari ejen bagi menjual rumah tersebut bagi urusan berkenaan.

Beliau berkata, kes penipuan berkenaan disiasat di bawah Seksyen 420 Kanun Keseksaan.

Katanya, orang ramai boleh menyemak akaun bank dan nombor telefon yang mungkin terlibat dalam kes penipuan melalui pautan <https://semakmule.rmp.gov.my>.